



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ ՀԱՆՁՆԱԺՈՂՈՎ
ՈՐՈՇՈՒՄ**

29 հունվարի 2021 թվականի №20Ա
ք.Երևան

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ ԾԱՌԱՅՈՒԹՅՈՒՆՆԵՐԸ
ԿԱՐԳԱՎՈՐՈՂ ՀԱՆՁՆԱԺՈՂՈՎԻ 2018 ԹՎԱԿԱՆԻ ՀՈՒՆՎԱՐԻ 31-Ի №14Ա
ՈՐՈՇՄԱՆ ՄԵՋ ՓՈՓՈԽՈՒԹՅՈՒՆ ԿԱՏԱՐԵԼՈՒ ՄԱՍԻՆ**

Հաշվի առնելով, որ՝

ա) «ՍՈԼԱՐՍԻՍ» սահմանափակ պատասխանատվությամբ ընկերությունը (այսուհետ՝ Ընկերություն) 2021 թվականի հունվարի 8-ի գրությամբ դիմել է Հայաստանի Հանրապետության հանրային ծառայությունները կարգավորող հանձնաժողով (այսուհետ՝ Հանձնաժողով)՝ խնդրելով 34 ամսով երկարաձգել Հանձնաժողովի 2018 թվականի հունվարի 31-ի №14Ա որոշմամբ Ընկերությանը տրամադրված «Արգեստ» հողմային էլեկտրակայանում (այսուհետ՝ Կայան) էլեկտրական էներգիայի (հզորության) արտադրության ԼԷ №0618 լիցենզիայով (այսուհետ՝ ԼԷ №0618 լիցենզիա) ամրագրված կառուցման ժամանակահատվածը: Ընկերությունը հայտնել է, որ իր 100 տոկոս բաժնեմասի սեփականատեր է հանդիսանում «ԶՈԴ ՈւԻՆԴ» փակ բաժնետիրական ընկերությունը, որը էլեկտրական էներգիայի (հզորության) արտադրության ԼԷ №0620 լիցենզիայի համաձայն շահագործում է Հայաստանի Հանրապետության Գեղարքունիքի մարզի Գեղամասար համայնքի վարչական տարածքում կառուցված (գյուղ Սոթք) «Զող Ուինդ» հողմային էլեկտրակայանը: Հաշվի առնելով նշված հողմային էլեկտրակայանի շահագործման փորձը, տվյալ տարածքում առկա հողմային ռեսուրսները և դրա շնորհիվ էլեկտրական էներգիայի ավելի արդյունավետ արտադրության հեռանկարը, «ԶՈԴ ՈւԻՆԴ» փակ բաժնետիրական ընկերությունը նպատակադրվել էր ներդրումներն իրականացնել այդ ուղղությամբ, այսինքն «Արգեստ» հողմային էլեկտրակայանի կառուցման փոխարեն որոշվել էր 4 ՄՎտ-ով ավելացնել «Զող Ուինդ» հողմային էլեկտրակայանի հզորությունը, ինչը կնպաստեր այդ ռեսուրսի առավել արդյունավետ օգտագործմանը: Այդ նպատակով նախագծային կազմակերպության

կողմից կազմվել են համապատասխան նախագծային փաստաթղթերը, և անցկացվել է Հայաստանի Հանրապետության օրենսդրության պահանջներին համապատասխան փորձաքննություն, ինչի պատճառով «Արգեստ» հողմային էլեկտրակայանի կառուցման նախագծային փաստաթղթեր չեն կազմվել: Սակայն «Ձող Ուինդ» հողմային էլեկտրակայանը և դրան հարակից տարածքները 2020 թվականի սեպտեմբերի 27-ից մինչև նոյեմբերի 9-ը Ադրբեջանի կողմից սանձազերծված պատերազմի արդյունքում ներկայումս վերահսկվում են ադրբեջանական զինված ուժերի կողմից: Ստեղծված իրավիճակից ելնելով՝ նոր նախագիծը հնարավոր չէ իրագործել, չնայած այն հանգամանքին, որ «ԶՈԴ ՈՒԻՆԴ» փակ բաժնետիրական ընկերության հողմային էլեկտրակայանով ծանրաբեռնված հողամասի և այլ հողամասերի նկատմամբ իրավունքը ստացել է պետական գրանցում, այսինքն այն ճանաչվել է Հայաստանի Հանրապետության կողմից: Ելնելով այն հանգամանքից, որ ստեղծված իրավիճակը հանդիսանում է ֆորս մաժորային, և նշված հանգամանքներն ունեն արտակարգ և անկանխելի բնույթ, դուրս են Ընկերության վերահսկողությունից՝ Ընկերությունը խնդրել է ԼԷ №0618 լիցենզիայով ամրագրված կառուցման ժամանակահատվածի երկարաձգմամբ պայմանավորված երաշխիքով սահմանված գումարը Հայաստանի Հանրապետության պետական բյուջե չփոխանցել,

բ) Հանձնաժողովը 2021 թվականի հունվարի 15-ի №ԳԲ/34.1-Մ4-3/71-2021 գրությամբ դիմել է Հայաստանի Հանրապետության տարածքային կառավարման և ենթակառուցվածքների նախարարություն, Հայաստանի Հանրապետության հաշվեքննիչ պալատ և Հայաստանի Հանրապետության պետական վերահսկողական ծառայություն՝ դիմումի վերաբերյալ վերջինների դիրքորոշումները ստանալու նպատակով,

գ) Հայաստանի Հանրապետության տարածքային կառավարման և ենթակառուցվածքների նախարարության և Հայաստանի Հանրապետության պետական վերահսկողական ծառայության 2021 թվականի հունվարի 22-ի գրություններով Հանձնաժողով ներկայացված դիրքորոշումների համաձայն՝ հարցը շահագրգիռ պետական մարմինների ներգրավմամբ լրացուցիչ քննարկման կարիք ունի, ինչից ելնելով Հանձնաժողովը 2021 թվականի հունվարի 26-ի №ԳԲ/34.1-Մ4-3/194-2021 գրությամբ դիմել է Հայաստանի Հանրապետության վարչապետի աշխատակազմի ղեկավարին՝ շահագրգիռ գերատեսչությունների մասնակցությամբ քննարկում կազմակերպելու նպատակով,

դ) Հանձնաժողովի 2013 թվականի նոյեմբերի 1-ի №374Ն որոշմամբ հաստատված՝ էներգետիկայի բնագավառում գործունեության լիցենզավորման կարգի (այսուհետ՝ Կարգ)՝ №3 հավելվածի՝ երաշխիքների ներկայացման և պետական բյուջե փոխանցման կարգի՝

- 7-րդ կետի 1-ին ենթակետի համաձայն՝ Հանձնաժողովը որոշում է ընդունում երաշխիքով սահմանված գումարի կեսը Հայաստանի Հանրապետության պետական բյուջե փոխանցելու մասին, եթե որոշում է ընդունել արտադրության լիցենզիայով սահմանված կառուցման (վերակառուցման) ժամանակահատվածը երկարաձգելու մասին,
- 10-րդ կետի համաձայն՝ լիցենզավորված անձի ներկայացրած երաշխիքով սահմանված գումարը Կարգով սահմանված դեպքերում Հայաստանի Հանրապետության պետական բյուջե չի փոխանցվում, եթե նրա կողմից լիցենզիայի պայմանների չկատարումը կամ ոչ պատշաճ կատարումը հետևանք է ֆորս մաժորի,

ե) Հանձնաժողովը, ուսումնասիրելով առկա փաստական հանգամանքները, գտնում է, որ ԼԷ №0618 լիցենզիայով ամրագրված կառուցման ժամանակահատվածը ենթակա է երկարաձգման ընկերության կողմից հայցվող՝ 34 ամիս ժամկետով, իսկ Ընկերության ներկայացրած երաշխիքով սահմանված գումարի կեսը Հայաստանի Հանրապետության պետական բյուջե փոխանցելու հարցը ենթակա է քննարկման դրա առնչությամբ շահագրգիռ պետական մարմինների վերջնական դիրքորոշումները ստանալուց հետո,

զ) Ընկերության կողմից ԼԷ №0618 լիցենզիայով ամրագրված պարտավորությունների պատշաճ կատարման ապահովման նպատակով Հանձնաժողով ներկայացրած «ԱԿԲԱ-ԿՐԵԴԻՏ ԱԳՐԻԿՈԼ ԲԱՆԿ» փակ բաժնետիրական ընկերության 2018 թվականի հունվարի 10-ի №01-7 գրությամբ տրամադրված №17 41 40 04914/1 երաշխիքի գործողության ժամկետը մինչև 2021 թվականի ապրիլի 13-ն է, և

հիմք ընդունելով «էներգետիկայի մասին» օրենքի 30-րդ հոդվածի 1-ին մասը, «Նորմատիվ իրավական ակտերի մասին» օրենքի 1-ին հոդվածի 2-րդ մասը, 33-րդ, 34-րդ հոդվածները և Կարգը՝ Հանձնաժողովը **որոշում է.**

1. 34 ամսով երկարաձգել Հանձնաժողովի 2018 թվականի հունվարի 31-ի «ՍՈԼԱՐՍԻՍ» սահմանափակ պատասխանատվությամբ ընկերությանը «Արգեստ» հողմային էլեկտրակայանում էլեկտրական էներգիայի (հզորության) արտադրության լիցենզիա տրամադրելու մասին» №14Ա որոշմամբ Ընկերությանը տրամադրված «Արգեստ» հողմային էլեկտրակայանում էլեկտրական էներգիայի (հզորության) արտադրության

ԼԷ N°0618 լիցենզիայով ամրագրված կառուցման ժամանակահատվածը՝ որոշման մեջ «մինչև 2021 թվականի հունվարի 31-ը» բառերը փոխարինելով «մինչև 2023 թվականի նոյեմբերի 30-ը» բառերով:

2. Ընկերությանը՝

- 1) ԼԷ N°0618 լիցենզիայի պայմանները չկատարելու պատճառով «Արգեստ» հողմային էլեկտրակայանում կառուցման ժամանակահատվածը երկարաձգելու համար, սույն որոշումն ուժի մեջ մտնելու պահից քառասունհինգօրյա ժամկետում Հանձնաժողով ներկայացնել 10 000 000 (տասը միլիոն) դրամ գումարի երաշխիք՝ առնվազն մինչև 2024 թվականի հունվարի 14-ը գործողության ժամկետով,
- 2) ընդունել ի գիտություն, որ ներկայացրած երաշխիքով սահմանված գումարի կեսը Հայաստանի Հանրապետության պետական բյուջե փոխանցելու հարցը կքննարկվի դրա առնչությամբ շահագրգիռ պետական մարմինների վերջնական դիրքորոշումները ստանալուց հետո,
- 3) ընդունել ի գիտություն, որ իրավասու է սույն որոշումն ուժի մեջ մտնելու պահից երկամսյա ժամկետում այն բողոքարկել Հանձնաժողով կամ Հայաստանի Հանրապետության վարչական դատարան:

3. Սույն որոշումն ուժի մեջ է մտնում 2021 թվականի հունվարի 31-ից:

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ ՀԱՆՐԱՅԻՆ
ԾԱՌԱՅՈՒԹՅՈՒՆՆԵՐԸ ԿԱՐԳԱՎՈՐՈՂ
ՀԱՆՁՆԱԺՈՂՈՎԻ ՆԱԽԱԳԱՀ՝**

ք. Երևան
29 հունվարի 2021թ.

